



SAKSFRAMLEGG

Saksnr:	Utval:	Dato
	Bygdeutviklingsutvalet	

Sakshandsamar:	Arkiv:	ArkivsakID
Tore Henrik Øye	FE-223, FA-V12	23/89

SØKNAD OM BYGDEUTVIKLINGSMIDLAR SOM UNDERSKOTSGARANTI FOR VINTERTREFFET 2023

Vedlagte saksdokument:

Søknad om bygdeutviklingsmidlar - Underskotsgaranti for Vintertreffet 2023

Kommunedirektøren sitt framlegg til vedtak:

Bygdeutviklingsutvalet løyver inntil kr. 50 000,- i bygdeutviklingsmidlar til Vaksdal Underhaldningslag som underskotsgaranti for gjennomføring av Vintertreffet 2023.

Tilskotet er gjeve med utgangspunkt i retningslinjer for tilskot til bygdeutvikling.

Tilskotet er knytt til faktisk underskot, dokumentert gjennom godkjent rekneskap.

Tilskotet vert betalt ut etter innsending av sluttrapport, med betalingsoppmoding og naudsynt dokumentasjon.

Løyvinga gjeld i to år, fram til og med 01.03.2025.

Saksopplysningar:

Samandrag/konklusjon (kort om saka)

Bygdeutviklingsutvalet har kr. 500 000,- i bygdeutviklingsmidlar til fordeling etter søknad i 2023. Det er utarbeidd egne retningslinjer for tildeling.

Vaksdal Underhaldningslag søker om kr. 79 500,- i tilskot til å dekkje mogleg underskot ved Vintertreffet 2023. Søknadssummen utgjer 10 % av budsjettert kostnad med arrangementet.

Vintertreffet er eit årleg konsert-/musikkarrangement på Vaksdal, med mål om å trekkje nasjonale artistar til bygda, i tillegg til lokale. Arrangementet har eit almennyttig føremål. Årets tilskiping vert halde frå 16. til 18. februar (veke 7).

Med bakgrunn i gjeldande retningslinjer og tidlegare praksis, går Kommunedirektøren inn for å løyve inntil kr. 50 000,- i bygdeutviklingsmidlar som underskotsgaranti for Vintertreffet 2023.

Bakgrunn for saka

Bygdeutviklingsutvalet har kr. 500 000,- i bygdeutviklingsmidlar til fordeling i 2023. Utvalet fordelar midlar på bakgrunn av innkomne søknadar, etter innstilling frå Kommunedirektøren. «Mars-omgangen» er den første av to tildelingsrundar.

I søknad av 17.01.23 søker Vaksdal Underhaldningslag om kr. 79 500,- i bygdeutviklingsmidlar som underskotsgaranti for «Vintertreffet 2023». Arrangementet skal gjennomførast på Vaksdal, frå 16. til 18. februar. Kostnaden med tilskipinga er ved søknadsdato, budsjettert til kr. 795 000,-. Søknads-summen utgjer soleis 10 % av budsjettet.

Vaksdal Underhaldningslag vart skipa hausten 2004, og har gjennomført årlege vintreff sidan dette, men også før formell skiping av laget. Laget skal ha ålmennyttig karakter, og i følgje søknaden er føremålet å få nasjonale og lokale artistar til Vaksdal.

Mykje av arbeidet med festivalen vert gjennomført på dugnad. I dette høvet går det fram at 1,2 millionar kroner i overskot frå tidlegare års arrangement, er overført til lokale lag og organisasjonar som har delte på dugnaden, i tråd med laget sitt føremål om å tilføre bygda noko positivt.

Utgangspunktet for søknaden om underskotsgaranti, er at det stadig er blitt meir krevjande å arrangere Vintertreffet. Dette er mellom anna knytt til dyrare driftskostnader, auka honorar til artistar og avgrensa publikumskapasitet, med maksimalt 400 plassar i lokalet på Vaksdal. Inntektssida er i dette høvet vanskeleg å gjere nok med, i følgje søkjar, og auke i billettprisane vert ikkje sett på som noko god løysing.

I ljøs av den skildra situasjonen, seier søkjar det vil bli utfordrande å vidareføre arrangementet. Intensjonen er likevel å halde på så lenge som mogleg. I dette høvet vil ei løyving av underskotsgaranti frå Bygdeutviklingsutvalet, vere til god hjelp, i følgje søkjar, som vektlegg at målet alltid er å skape overskot.

I søknaden viser underhaldningslaget til at det i 2022 vart gjeve bygdeutviklingsmidlar til konsertarrangementet Elvebrus og fiskefestivalen på Stamnes. Laget meiner difor at ei løyving av underskotsgaranti til Vintertreffet vil gje lik og rettvís bruk av midlane, og at tildeling av midlar vil støtte opp om eit lokalt og populært underhaldningstilbod.

For nærare informasjon om Vintertreffet vert det vist til søknaden frå underhaldningslaget.

Formelt grunnlag/rammer:

- «Retningslinjer for tilskot til bygdeutvikling», vedtekne 26.05.20.
<https://www.vaksdal.kommune.no/innhald/landbruk-nering-og-skatt/bygdeutvikling/retningslinjer-for-tilskot-til-bygdeutvikling/>

Vurdering og konsekvensar:

Søknaden frå Vaksdal Underhaldningslag oppfyller kravet til registrering i Brønnøysundregistrene (foreining), og søknaden inneheld tilstrekkeleg med opplysingar for sakshandsaming etter krava i bygdeutviklingsmidlane sine retningslinjer.

Vintertreffet på Vaksdal er eit mangeårig, populært og godt etablert konsertarrangement, med brei appell. Arrangementet er langt på veg ei merkevare det er knytt lokale forventningar til kvart år, som skapar lokalt engasjement, med høg dugnadsinnsats, både før og under tilskipinga. I dette høvet vert festivalen vurderte å falle innanfor føremålet med bygdeutviklingsmidlane, og kriteria for tildeling. Mellom anna kan det gjevast tilskot i tunge periodar, som arrangøren no opplever, med eit underskot på kr. 40 000,- i 2021. Samstundes vil Kommunedirektøren peike på praksisen med å dele eventuelle overskot med lag/organisasjonar som deltek med dugnad, som svært positiv. Dette gjev igjen grunnlag for aktivitetar i regi av desse laga, til glede for bygdesamfunnet. Ordninga viser også at Vintertreffet ikkje er eit kommersielt arrangement.

Med bakgrunn i den stadig meir krevjande, økonomisk situasjonen ved gjennomføring av årlege tilstellingar, peikar underhaldingslaget på at ein underskotsgaranti frå Bygdeutviklingsutvalet i 2023, og evt. for komande arrangement, vil styrkje grunnlag for å vidareføre tilskipinga. Kommunedirektøren har i dette høvet forståing for at arrangementet, med populære artistar, er dyrt og kapitalkrevjande, med avgrensa høve for finansiering, ut over billettinntekter. Det er likevel naturleg å ta utgangspunkt i at arrangøren søker eit program som kan forsvarast finansielt over tid, med tilpassing til forventa inntektsgrunnlag.

Bygdeutviklingsmidlane har avgrensa med kapital tilgjengeleg, og det må til kvar tid gjerast ei prioritering for bruk av midlane, ut frå innkomne søknadar. Med utgangspunkt i midlane sitt føremål vurdere difor Kommunedirektøren at det er like tenleg å leggje vekt på mindre ressurskrevjande og varige aktivitetar og opplevingstilbod i nærmiljøet, med tilgjengelege gjennom året, som å gje tilskot til store festivalar/arrangement. Finansiering av slike tiltak vil kunne ta mykje av midlane, og gå ut over andre tilbod. Vurderinga er difor at bygdeutviklingsmidlane over tid, ikkje kan vere ein garanti for å dekkje eventuelle underskot med større tilskipingar i kommunen. Dette er det ikkje rom for i budsjettet.

Ved tildeling av bygdeutviklingsmidlar er det naturleg å ta utgangspunkt i tidlegare praksis. Søknadar som har sterke likskapstrekk, bør i dette høvet handsamast så likt som mogeleg, med krav til god grunngjeving, dersom det vert gjort skilnad.

I 2022 løyvde Bygdeutviklingsutvalet kr. 75 000,- i tilskot til festivalen Elvebrus, som vart arrangert for første gong. Løyvinga var i dette høvet eit tilskot for å gje starthjelp til eit nytt - og vonleg - varig arrangement. Argumentasjonen for tildeling skil seg difor frå mogleg løyving til etablerte arrangement, som Vintertreffet, og kan ikkje samanliknast direkte etter Kommunedirektøren si vurdering.

I 2022 var det også gjeve bygdeutviklingsmidlar til fiskefestivalen på Stamnes, med kr. 40 000,- i tilskot. Tilskotet vart løyvd for å dekkje underskot for kulturdelen av arrangementet. Denne vurderinga kan samanliknast med Vaksdal Underhaldningslag sin søknad om midlar. Det same gjeld for søknaden frå Daledagane om å få dekkje underskotet ved arrangementet i 2022.

Som det går fram av sakshandsaminga, meiner Kommunedirektøren at det i utgangspunktet ikkje bør løyvast bygdeutviklingsmidlar til etablerte festivalar, om ikkje særskilte grunnar ligg føre. Likevel bør tidlegare praksis vere retningsgjevande, inntil eventuelle endringar av reglane for tildeling. Av omsyn til komande søknadsomgangar, kan det difor vere nyttig å få avklart om etablerte arrangement/festivalar skal kunne få tilskot, eller om tilskot skal avgrensast til nyskapingar. Dette ligg fortrinnsvis til Bygdeutviklingsutvalet å fastsetje gjennom retningslinene.

Med bakgrunn i gjeldande retningslinjer og tidlegare praksis, går Kommunedirektøren inn for å løyve inntil kr. 50 000,- i bygdeutviklingsmidlar som underskotsgaranti for Vintertreffet 2023. Framlegget

utgjør kr. 29 500,- mindre enn kva det er søkt om, der ei utbetaling vert knytt til dokumentasjon av underskot i sluttregneskapen for arrangementet.